

元和郡縣圖志卷第十二

唐 李吉甫 撰

河東道一

河中府

河東赤

開元戶七萬二百七  
元和戶一萬九千六百

鄉六十五

今為河中節度使理所

管州五 河中府 絳州 晉州 慈州 隰州

縣三十七 都管戶四萬一千三百六十五

禹貢冀州之域按今州本帝舜所都蒲坂也春秋時為魏耿楊芮之地左傳曰晉獻公滅魏以賜畢萬服虔注曰魏在晉之蒲坂畢萬之後十代至文侯列為諸侯至惠王僭號稱王至王假為秦所滅今州即秦河東郡地也漢元年項羽封魏豹為西魏王王河東都平陽二年豹降從漢王在滎陽請歸侍親疾至則

元和郡縣圖志卷十二

河東道一

絕河津反為楚盡有太原上黨地九月韓信虜豹定魏地置河東上黨太原郡文帝時季布為河東守文帝謂曰河東吾股肱郡故特召君耳後魏太武帝於今州理置雍州延和元年改雍州為秦州周明帝改秦州為蒲州因蒲坂以為名隋大業三年罷州又置河東郡隋將屈突通守河東高祖師次桑泉縣通出守潼關乃令鷹揚郎將堯君素王行本留鎮郡城遂於今桑泉縣置河東郡武德元年罷郡置蒲州其年堯君素為賊人薛宋李楚客所殺王行本仍堅守不賓二年置蒲州總管三年行本歸化自桑泉移蒲州於今理九年廢總管置都督府復為州開元元年五月改為河中府仍置中都麗正殿學士韓覃上疏陳其不可至六月詔停復為州乾元三年又改為河中府大曆中元載為相又上建中都議曰自古建大功者未嘗不用天因地

故高祖保關中光武據河內皆深根固本以制天下臣等考天地之心本聖人之意驗古往之事切當今之務則莫若建河中爲中都隸陝虢晉絳汾潞儀石慈隰等十城爲藩衛長安去中都三百里順流而東邑居相望有羊腸底柱之險羊腸在潞州壺關縣東南一百濁河孟門之限孟門在慈州文城縣西南三十六里卽龍門上口以輶輶爲襟帶與關中爲表裏劉敬所謂扼天下之吭而撫其背卽此之謂推是而言則建中都將欲固長安非欲外之也將欲安成周非欲舍之也將欲制蠻夷非欲懼之也將欲定天下非欲弱之也河中之地左右王都黃河北來太華南倚總水陸之形勝鬱關河之氣色每歲白露旣降涼風已高陛下處金城湯池內綏華夏登信臣驍將外馭戎狄出於仲秋還於農隙有漕濁泛舟之便無登高履險之虞不傷財不害人得養威而時狩如此則國有保安之所家無係虜之憂矣疏奏不省初代宗自幸陝之後每歲八九月閒京師恟恟常懼犬戎復至將相之家皆裝儲糗爲行李之備載知人情不安遂奏此疏冀因制置竊有兵權議亦宏博盡當時利害然代宗探見載意義故不行或曰建中都江融設險圖之首篇也融誅後書已不傳不知斯言何自而得

府境 東西二百五里 南北一百七十七里  
八到 西南至上都三百二十里 東至東都五百八十五里 東北至絳州取桐鄉路二百六十里 西南至華州一百四十七里 西至同州六十七里 東南至虢州一百八十三里 東南至陝州二百四十五里

貢賦 開元貢 龍骨 麥麩扇 賦 絹 竹扇 漆匣 麻 布 乾棗 鳳棲梨

管縣八 河東 河西 臨晉 猗氏 虞鄉 寶鼎

解 永樂

河東縣次赤郭下本漢蒲坂縣地也屬河東郡隋開皇三年罷郡縣

仍屬蒲州十六年移蒲坂縣於城東仍於今理別置河東縣大業二年省蒲坂縣入河東縣

雷首山一名中條山在縣南十五里

風陵堆山在縣南五十五里與潼關相對

長原一名蒲坂在縣東二里其原出龍骨

河水北自桑泉縣界流入

媯汭水源出縣南雷首山尚書曰釐降二女于媯汭

州城卽蒲坂城也城中有舜廟城外有舜宅及二妃壇

故陶城在縣北四十里尚書大傳曰舜陶于河濱

故堯城在縣南二十八里

蒲坂關一名蒲津關在縣西四里魏志曰太祖西征馬超韓遂

夜渡蒲津關卽謂此也今造舟爲梁其制甚盛每歲徵竹索價

謂之橋腳錢數至二萬亦關河之巨防焉

風陵故關一名風陵津在縣南五十里魏太祖西征韓遂自潼

關北渡卽其處也

舜祠在州理舜城中貞觀十一年詔致祭以時灑埽

伯夷墓在縣南三十五里雷首山貞觀十一年詔致祭禁樵蘇

河西縣次赤郭下本朝邑縣東地乾元三年因置河中府割朝邑縣

置

臨晉縣次畿府七十四里西南至本漢解縣地後魏改爲北解縣隋開皇

十六年分猗氏縣於今理置桑泉縣因縣東桑泉故城以爲名

也天寶十二年改爲臨晉

河水經縣西四十里

涑水在縣東二十三里

故解城本春秋時解梁城又為漢解縣城也在縣東南十八里  
晉惠公許賂秦伯以河外列城五東盡虢略內及解梁城是也  
桑泉故城在縣東十三里左傳曰重耳圍令狐入桑泉謂此也  
故司空魏國公裴寂墓在縣東北十七里

猗氏縣

次畿 西南至 府一百一十里

本漢舊縣即猗頓之所居也東魏恭帝

二年改猗氏為桑泉縣周明帝復改桑泉為猗氏縣屬汾陰郡  
隋開皇三年罷郡屬蒲州

涑水經縣南六里

故郇邑在縣西南四里左傳曰晉侯謀去故絳欲居郇瑕氏之  
地韓獻子曰郇瑕氏土薄水淺不如新田遂遷新田即平陽絳

邑縣也

虞鄉縣

次畿 西至 府七十里

本漢解縣地也後魏孝文帝改置南解縣

屬河東郡周明帝武成二年廢南解縣別置綏化縣武帝改綏  
化為虞鄉

壇道山一名百梯山在縣西南十二里山高萬仞躋攀者百梯  
方可升降故曰百梯山南有穴莫測淺深每有勅使投金龍於  
此兼醮焉

王官故城在縣南二里左傳曰秦伯濟河焚舟取王官

五老仙人祠在縣西十七里

寶鼎縣

次畿 西南至 府一百一十里

本漢汾陰縣也屬河東郡劉元海時廢

汾陰縣入蒲坂縣後魏孝文帝復置汾陰縣開元十一年改為  
寶鼎縣

黃河在縣北十一里趙簡子沈佞臣樂激之所也

汾水北去縣二十五里

后土祠在縣西北一十一里

殷湯陵在縣北四十三里

解縣次畿西北至府四十五里本漢舊縣也屬河東郡隋大業二年省解

縣九年自綏化故城移虞鄉縣於廢解縣理即今縣理是也武

德元年改虞鄉縣為解縣屬虞州因漢舊名也仍於蒲州界別

置虞鄉縣貞觀十四年廢虞州解縣屬河中府

中條山在縣南二十里

鹽池在縣東十里

女鹽池在縣西北三里東西二十五里南北二十里鹽味少苦

不及縣東大池鹽俗言此池亢旱鹽即凝結如逢霖雨鹽則不

生今大池與安邑縣池總謂之兩池官置使以領之每歲收利

納一百六十萬貫

熨斗陂在縣東北二十五里

通路自縣東南踰中條山出白徑趨陝州之道也山嶺參天左

右壁立閒不容軌謂之石門路出其中名之白徑嶺焉

永樂縣次畿北至府九十里本漢河北縣地周明帝改河北縣為永樂

縣武帝省永樂縣以地屬芮城縣武德二年分芮城於縣東北

二里永固堡重置永樂屬芮州七年移於今理貞觀八年改屬

河中府

中條山在縣北三十里

河水經縣南二里

永樂澗水源出中條山經縣東二里又南入河

五老山在縣東北十三里堯升首山觀河渚有五老人飛爲流星上入昴因號其山爲五老山

絳州絳郡 開元戶八萬一千九百八十八 鄉一百七十六

禹貢冀州之域春秋時屬晉左傳曰晉人謀去故絳欲居郇瑕

氏之地韓獻子曰郇瑕氏土薄水淺不如新田遂遷新田注曰

新田今平陽絳邑縣是也三卿滅晉其地屬魏戰國時亦爲魏

地秦爲河東郡地今州卽漢河東郡之臨汾縣地也魏正始八

年分河東汾北置平陽郡又爲平陽郡地後魏太武帝於今理

西南二十里正平縣界柏壁置東雍州及正平郡其地屬焉孝

文帝廢東雍州東魏靜帝復置周明帝武成二年改東雍州爲

絳州隋大業三年廢州爲絳郡初義師將西入關大將軍進次

古堆去絳郡十餘里通守陳叔達堅守不下高祖命廚人曰明

日早下絳城然後食乃引兵攻城自旦及辰破之仍置絳郡武

德元年罷郡置絳州總管三年復爲絳州

州境東西三百六十五里

八到西南至上都五百九十里

東南至東都取垣縣王屋路四百八十里

東北至晉州一百四十里

南至陝州二百里

東至澤州四百四十里

西北至慈州二百四十里

貢賦開元貢梨蠟防風

管縣九 正平 太平 萬泉 曲沃 翼城 聞喜

絳 稷山 龍門

正平縣望郭下 本漢臨汾縣地屬河東郡隋開皇三年罷郡改屬

絳州十八年改臨汾縣爲正平縣因正平故郡城爲名也

汾水東北自曲沃縣界流入

澮水東自曲沃縣流入

柏壁在縣西南二十里後魏明帝元年於此置柏壁鎮太武帝廢鎮置東雍州及正平郡周武帝於此改置絳州建德六年又自此移絳州於今稷山縣西南二十里玉壁按柏壁高二丈五尺周迴八里

晉虎祁宮在縣南六里左傳曰石言于晉魏榆師曠曰石不能言或憑焉抑又聞之作事不時怨讎動于人則有非言之物而言於是晉侯方築虎祁之宮今按宮南有澮水北有汾水俱西流至宮西而合隋末依宮餘址築堡今名修義堡

晉靈公臺在縣西北三十一里左傳曰晉靈公不君從臺上彈人觀其避丸卽此臺也

武平故關在縣西三十里高齊時置周平齊廢

晉齊姜墓在縣南九里申生之母也

驪姬墓在縣南八里

太平縣

緊南至州五十里

本漢臨汾縣地屬河東郡後魏太武於今縣

東北二十七里太平故關城置秦平縣屬平陽郡周改秦平爲

太平縣因關名隋開皇三年罷郡改屬晉州十年改屬絳州

汾水在縣東二十九里

太平故關城在縣東北二十七里

白波壘在縣東南十二里後漢末黃巾賊於西河白波谷寇太原於此築壘

子奇壘在縣東三十里後秦王姚興遣弟義陽公平字子奇與征虜將軍狄伯支等步騎四萬伐魏攻平陽陷之遂據柴壁魏軍大至截汾水以守之平大敗將麾下三十騎赴汾水而死狄

伯支等十將四萬人皆為魏所擒今按此壘西臨汾水壘側尙有柴村子奇投汾水卽此處也

趙盾祠在縣西南十八里

李牧祠在縣東北十三里

晉公孫杵臼程嬰墓並在縣南二十一里趙盾墓塋中

萬泉縣上東北至州一百二十里本漢汾陰縣地屬河東郡又薛通城者

後魏道武帝天賜元年赫連勃勃僭號夏侵河外於時有縣人

薛通率宗族千餘家西去漢汾陰縣城八十里築城自固因名

之武德三年於薛通故城置萬泉縣屬泰州縣東谷中有井泉

百餘區因名萬泉貞觀十七年廢泰州縣屬絳州

曲沃縣緊西至州五十里本晉舊鄆絳縣地也漢以為絳縣屬河東郡

後漢加邑字屬郡不改晉改屬平陽郡後魏孝文帝於今縣東

南十里置曲沃縣屬正平郡因晉曲沃為名隋開皇三年罷正

平郡改屬絳州

絳山在縣南十三里出銅鈔

汾水西南去縣二十二里

澮水在縣南二里

絳水在縣東南三里

漢絳縣本春秋晉都新田也在縣南二里周勃為絳侯卽其地

也今號絳邑故城

涇庭故城在縣西北二十里左傳曲沃武公伐翼次于涇庭是

也

臺駘神祠在縣西南三十六里左傳曰晉侯有疾卜臺駘為祟

問于子產子產曰昔金天氏有裔子曰昧為元冥師生允格臺



駘能業其官帝用嘉之封諸汾川今晉主汾而滅之由是觀之則臺駘汾神也

翼城縣

望西南至州一百里

本漢絳縣地也屬河東郡後魏明帝置北

絳縣隋開皇末改為翼城縣屬絳州因縣東古翼城為名也武

德元年於此置澮州四年廢澮州縣屬絳州

澮高山在縣東南二十五里澮水出焉其山出鐵隋於此置平

泉冶

澮水今改名翼水

故翼城在縣東南十五里晉故絳都也

故唐城在縣西二十里堯裔子所封也

聞喜縣

望西北至州六十里

本漢左邑縣之桐鄉也武帝元鼎六年將

幸緱氏至此聞南越破大喜因立聞喜縣屬河東郡後魏改屬

正平郡隋開皇三年罷郡屬絳州

景山在縣東南十八里

董澤一名董池陂在縣東北十四里左傳廚武子曰董澤之蒲

可勝既乎

桐鄉故城漢聞喜縣也在縣西南八里俗以此城為伊尹放太

甲于桐宮之所孔注尚書曰桐湯葬地也按今尸鄉有放太甲

處在偃師縣界非此也又漢大司農朱邑屬其子葬桐鄉者又

在今舒州界亦非此也

王官故城今名王城在縣南十五里左傳曰俘我王官

祁奚墓在縣東二十二里今太原祁縣又有祁奚墓未詳孰是

絳縣

上西北至州八十里

本漢聞喜縣地後魏孝文帝置南絳縣其地

屬焉因縣北絳山為名也屬正平郡恭帝去南字直為絳縣隋

開皇三年罷郡改屬絳州義寧元年屬翼城郡武德元年屬澮州尋改屬絳州

備窮山在縣東北二十五里出鐵鉞穴五所

絳水一名沸泉水出絳山東谷懸流奔壑一十許丈西北注於澮史記稱智伯率韓魏引絳水灌晉陽不浸者三版智氏曰吾始不知水可以亡人之國今乃知之汾水可以灌安邑絳水可以灌晉陽於是韓魏之君共殺智伯水在縣北十四里

晉文公墓在縣東二十里左傳曰文公卒將殯于曲沃出絳柩有聲如牛貞觀十一年詔致祭五十步禁樵蘇

稷山縣

緊東至州四十九里

本漢聞喜縣地屬河東郡後魏孝文帝於今縣東南三十里置高涼縣屬龍門郡隋開皇三年罷郡縣屬絳州十八年改爲稷山縣因縣南稷山以爲名也

稷山在縣南五十五里左傳曰晉侯理兵于稷以略狄土卽此地也

汾水在縣南五十里

玉壁故城在縣南十二里後魏文帝大統四年東道行臺王思政表築玉壁城因自鎮之八年高歡寇玉壁思政有備攻不克周初於此置玉壁總管武帝建德六年廢總管城周迴八十里四面並臨深谷

稷祠在縣南五十里稷山上

羲和墓在縣東北七十里

龍門縣

望東至州一百一十里

古耿國殷王祖乙所都晉獻公滅之以賜趙夙秦置爲皮氏縣漢屬河東郡後魏太武帝改皮氏爲龍門縣因龍門山爲名屬北鄉郡隋開皇三年廢郡以縣屬絳州十六

年割屬蒲州武德三年屬泰州貞觀十七年廢泰州縣隸絳州汾水北去縣五里漢武帝行幸河東作秋風辭卽此水也故耿城在縣南十二里古耿國也

伏龍原在縣西南十八里

黃河北去縣二十五里卽龍門口也禹貢曰浮于積石至于龍門注曰龍門山在河東之西界大禹導河積石疏決龍門卽斯處也河口廣八十步巖際鐫迹遺功尙存三秦記曰河津一名龍門水陸不通魚鼈之屬莫能上江海大魚集龍門下數千不得上上則爲龍故曰曝鳃龍門水經注曰其魚出鞏縣鞏穴每三月則上渡龍門得則爲龍否則點額而還

蜚廉故城在縣南七里

龍門關在縣西北二十二里

大禹祠在縣西二十五里龍門山上隋末摧毀貞觀九年奉勅更令修理

高祖神堯皇帝廟在禹廟南絕頂之上畫行幸儀衛之像蓋義寧初義旗至此也

晉州

平陽

開元戶六萬八百五十三  
元和戶六千五百六十七

鄉一百四十八  
鄉五十九

禹貢冀州之域卽堯舜禹所都平陽也春秋時其地屬晉戰國時屬韓後韓將馮亭以上黨降趙又屬趙在秦爲河東郡地今州卽漢河東郡之平陽縣也永嘉之亂劉元海僭號稱漢建都於此前趙錄曰太史令宣于循之言于元海曰蒲子崎嶇非可久安平陽唐堯昔都願陛下都之於是遷都平陽後魏太武帝於此置東雍州孝明帝改爲唐州尋又改爲晉州因晉國以爲名也高齊武成帝於此置行臺周武帝平齊置晉州總管義旗

初建改為平陽郡武德元年罷郡置晉州三年為總管府四年為都督府貞觀六年廢府復為晉州

州境東西三百二十四里南北二百五十里

八到西南至上都七百三十里東南至東都六百二十四里東北至汾州三百六十里東至潞州三百九十里西至慈州二百二十里東南至澤州四百一十里東北至沁州二百九十里西北至隰州二百五十里

貢賦開元貢蠟燭麻布

管縣九 臨汾 襄陵 神山 岳陽 洪洞 霍邑

趙城 汾西 冀氏

臨汾縣郭下本漢平陽縣屬河東郡在平水之陽故曰平陽魏置平陽郡平陽縣屬焉隋開皇元年改平陽縣為平河縣三年

元和郡縣圖志卷十二 河東道一

十三

罷郡縣屬晉州其年又改平河縣為臨汾縣

平山一名壺口山今名姑射山在縣西八里平水出焉尚書曰壺口治梁及岐

汾水北自洪洞縣界流入

潞水今名三交水東自襄陵縣界流入

堯廟在縣東八里汾水東

姑射神祠在縣北十三里姑射山東武德元年勅置

龍子祠在姑射山東平水之源其地茂林蒼鬱俯枕清流實晉之勝境也

劉和墓在縣南三十五里和元海太子也

劉聰墓在縣西南十一里聰元海第四子也

襄陵縣緊州二十六里西北至本漢舊縣也屬河東郡高齊省周平齊自

臨汾縣移禽昌縣於今理屬晉州隋大業二年改禽昌爲襄陵  
取漢舊名也縣東南有晉襄公陵因以爲名先是以禽昌名者  
後魏禽赫連昌以置縣故也

浮山在縣東南七里

潏水在縣北十五里

黑水經縣北二十五里

晉賈充墓在縣西南十里

神山縣中 西至州 七十八里本漢襄陵縣地也武德二年僕射裴寂奏

分襄陵縣置浮山縣屬晉州因山爲名至三年因羊角山神人  
見又改爲神山縣焉

黑山今名烏頭山在縣東四十四里黑水出焉

羊角山在縣東南三十一里

老君祠在縣東南二十里武德三年見神於羊角山下語曲沃  
縣人吉善行曰報大唐天子得聖理一千年其年勅遣通事舍  
人柳憲立祠因改縣爲神山

岳陽縣中 西南至州 一百五十里本漢穀遠縣地後魏孝莊帝置安澤縣

屬義寧郡隋開皇十六年改屬沁州大業二年改爲岳陽縣因  
山爲名義旗初建屬平陽郡武德元年罷郡改屬晉州

烏嶺山在縣東三十里

千畝原在縣北九十里周迴四十里

東池堡在縣南三十三里今堡中見貯義倉北面絕崖三面各  
二丈五尺周迴二里

洪洞縣望 西南至 州六十里本漢楊縣卽春秋時楊侯國也晉滅之以

賜大夫羊舌肸漢以爲縣屬河東郡魏置平陽郡楊縣屬焉隋

開皇三年罷郡改屬晉州義旗初建改爲洪洞縣因縣北故洪洞鎮爲名也

霍山在縣東北三十里事具霍邑縣

汾水自趙城縣東流入

洪洞故城在縣北六里後魏鎮城也姚最序行記曰周建德五年從行討齊師次洪洞百雉相臨四周重複控據要險城主張元靜率其所部肉袒軍門卽此也

禽昌故城在縣東南二十四里後魏太武帝禽赫連昌置因以名焉

師曠祠在縣東南二十五里

霍邑縣上南至州一百五十里本漢彘縣也屬河東郡因彘水爲名卽周厲王所奔之邑後漢順帝改爲永安縣屬郡不改後魏初省及

元和郡縣圖志卷十一

河東道一

西

宣武正始二年又置永安縣隋開皇十八年改爲霍邑縣屬晉州因霍山爲名隋末喪亂武牙郎將宋老生屯兵於此義師之至也老生陳兵據險師不得進忽有白衣老人詣軍門曰霍山神遣語大唐皇帝若向霍邑當東南傍山取路我當助帝破之遣人視之果有微道高祖笑曰此神不欺趙襄子豈當負吾邪於是進師去城十餘里老生戰敗劉宏基斬之遂平霍邑置霍山郡武德元年廢郡復置呂州縣屬焉貞觀十七年廢呂州縣又隸晉州

霍山一名太岳在縣東三十里禹貢曰壺口雷首至于太岳鄭玄注曰今河東彘縣霍太山是也

呂坂在縣西南十里有呂鄉晉大夫呂甥之邑也呂州取名於此

汾水經縣西二里

彘水出霍山經縣南一里

晉濟寺貞觀八年奉詔以破宋老生於此置寺

周厲王陵在縣東北二十五里

趙城縣上南至州九十五里本漢彘縣地即造父之邑也自漢迄晉不

改後魏太武帝廢其趙城縣義旗之初分霍邑縣置屬霍山郡

因故趙城為名武德元年廢郡置呂州縣屬焉貞觀十七年廢

呂州縣屬晉州

汾水出縣西四里

霍山廟在縣東南三十里霍山上甚有靈驗貞觀五年勅令修

理

汾西縣中東至州一百八十里本漢彘縣地屬河東郡後漢改彘縣為永

元和郡縣圖志卷十二

河東道

五

安縣高齊又於此置臨汾郡及臨汾縣隋開皇三年改臨汾縣

為汾西縣十六年改屬汾州十八年改屬呂州大業二年改屬

晉州義旗初屬霍山郡武德元年又屬呂州貞觀十七年廢呂

州又屬晉州

汾水在縣東三十五里

冀氏縣中西至州一百九十二里本漢猗氏縣地也屬上黨郡猗音居義反至

晉省後魏莊帝於猗氏城南置冀氏縣屬晉州

烏嶺山在縣西三十里

沁水在縣東一里

慈州文城開元戶一萬一千二百七十五鄉三十

禹貢冀州之域春秋時晉之屈邑獻公子夷吾所居也左傳曰

驪姬賂外嬖梁五與東關嬖五使言於公曰蒲與二屈君之疆

也不可無主乃使重耳居蒲夷吾居屈注曰二屈今平陽郡北  
屈縣是也左傳屈產之乘亦此地秦兼天下縣屬河東郡漢北  
屈縣屬河東郡後魏孝文帝於北屈縣南二十一里置定陽郡  
卽今州理是也隋開皇元年改定陽郡爲文城郡貞觀八年改  
爲慈州州內有慈烏戍因以爲名

州境

東西五百五十一里  
南北二百一十二里

八到

西南至上都六百八十五里  
東南至東都七百二十五里

北至隰州二百里

西北至丹州一百八十里  
東南至絳州太平縣一百九十里

西至龍門縣一百八十里

東南至晉州二百四十里

正西至黃河六十五里

東南至絳州二百四十里

貢賦

開元貢

蠟

白蜜

麻布

元和郡縣志卷十二

河東道一

去

管縣五

吉昌

文城

昌寧

忤城

呂香

吉昌縣

中郭下

本漢北屈縣地也屬河東郡後魏孝文帝於今州

置定陽郡并置定陽縣會有河西定陽胡人渡河居於此因以

爲名十八年改定陽縣爲吉昌縣貞觀八年改置慈州縣依舊

屬焉

壺口山在縣西南五十里

風山在縣北三十里山上有穴如輪風氣蕭瑟未嘗暫止當其  
衝略不生草故以風爲名

黃河北去縣六十里

姚襄城在縣西五十二里本姚襄所築其城西臨黃河控帶龍  
門孟門之險周齊交爭之地齊後主武平二年遣右丞相斛律  
明月左丞相平原王段孝先破周兵於此城遂立碑以表其功



其碑見存齊氏又於此城置鎮隋開皇廢武德二年又置鎮九年廢城高二丈周迴五里

文城縣

中 東南至州六十五里

本漢北屈縣地屬河東郡後魏孝文帝於此置斤城縣屬定陽郡隋開皇十六年改斤城縣爲文城縣

孟門山俗名石槽在縣西南三十六里淮南子曰龍門未闢呂梁未鑿河出孟門之上名曰洪水大禹疏通謂之孟門水經注曰風山西四十里河水南出孟門與龍門相對卽龍門之上口也實爲黃河之巨阨今按河中有山鑿中如槽東流懸注七十餘尺

文城故城在縣北三十里故老曰此城晉文公爲公子時避驪姬之難從蒲奔狄因築此城人遂呼爲文城

昌寧縣

中 西北至州五十里

本漢臨汾縣地屬河東郡後魏太武帝分

元和郡縣圖志卷十二

河東道一

七

臨汾縣置太平縣孝文帝又分太平縣置昌寧縣屬定陽郡隋開皇元年改屬耿州十八年又屬汾州大業二年改汾州爲文城郡縣仍隸焉貞觀八年改爲慈州縣又屬焉

兩乳山在縣西南七十里山有兩岫望如乳形因以爲名黃河北去縣七十九里

倚梯故城在縣西南一百五十里累石爲之東北兩面據嶺臨谷西南兩面俯眺黃河懸崖絕壁百餘尺其西南角卽龍門之上口也以城在高嶺非倚梯不得上因以爲名城中有禹廟後魏孝文帝西巡至此立碑碑今現在

禹廟在縣西南一百五里龍門東岸上其碑是後魏孝文帝所立

晉荀息墓在縣東北十六里

件城縣

中下 西南至州五十八里

本漢北屈縣地屬河東郡後魏於此置

件城郡領京軍縣孝文帝改京軍縣為件城縣隋開皇三年廢

件城郡改屬文城郡皇朝改屬慈州

石門山在縣北六十里

拓定故城在縣西一里周保定四年置以高齊境因以為名隋

廢

呂香縣

中 北至州一百二十里

本漢臨汾縣地也屬河東郡後魏太武帝

於此置邢軍縣屬件城郡孝文帝改為平昌縣隋開皇十六年

省平昌縣入件城縣義寧元年於此置平昌縣貞觀元年改為

呂香縣因舊呂香鎮為名屬慈州

馬頭山在縣南六十里其山峭巖形如馬首因以為名

橫嶺山在縣西北六十里

隰州

大寧 開元戶一萬八千五百八十三 元和戶二萬三千三百四十九

鄉四十八 鄉二十四

禹貢冀州之域春秋時為晉地七國屬魏秦為河東郡地在漢

為蒲子縣屬河東郡後魏初屬件城郡孝文改蒲子為長壽縣

太和十二年於此置汾州周宣帝大象元年於今州東百步置

龍泉郡隋開皇五年改為隰州大業三年又改為龍泉郡武德

元年又為隰州爾雅曰下濕曰隰以州帶泉泊下濕故以隰為

名

州境

東西南北

八到

西南取慈州路至上都八百八十五里 東南至東都八百八十里

東南至晉州汾西縣一百六十里 西至延州三百六十里

北至石州二百五十里 南至河一百四十里

東北至汾州二百七十里 東南至河中府六百里

貢賦

開元貢賦

蠟

白蜜

麝香

胡女布

管縣六

隰川

蒲

大寧

溫泉

永和

石樓

隰川縣

中郭下

本漢蒲子縣地也屬河東郡魏少帝分河東置平

陽郡蒲子縣屬焉劉元海僭號稱漢初理於蒲子後徙平陽又

於此置大昌郡以蒲子屬焉周宣帝改置長壽縣隋開皇十八

年改爲隰川縣南有龍泉下濕因以爲名屬隰州

蒲水源出縣東北石樓山

黃櫨水出縣東北黃櫨谷

故橫城在縣南三十五里隋仁壽四年楊諒作逆遣僞將吳子

通屯兵築城於此橫絕蒲州道因以爲名

蒲縣

中一百一十里西北至州

本漢蒲子縣地後魏於此置石城縣後廢

周宣帝於石城故縣置蒲子縣因漢蒲子縣爲名也屬定陽郡

隋開皇五年改屬隰州大業二年改爲蒲縣

五禿山在縣東北五十里山少草木故名五禿周迴七十七里

常安原在縣西南四十里東西廣四十里南北長二十里

仵城故城在縣西南六十三里後魏仵城郡也

大寧縣

中東北至州八十六里

本漢北屈縣地也屬河東郡後魏於此置

仵城縣尋廢周武帝又於廢縣西三里置大寧縣屬南汾州隋

大業二年省武德二年於此置中州復置大寧縣以屬焉貞觀

元年廢中州以縣屬隰州

孔山在縣西北二十五里上有穴如車輪三所東西相去各二

丈其深不測因以爲名

黃河北去縣六十八里

蒲水一名斤水去縣六十步

浮圖鎮齊河清四年築隋移大寧縣理此卽今縣理是也

溫泉縣

中 西南至州一百六十里

本漢土軍縣地也後魏於土軍故縣東

七十里置新城縣屬吐京郡太武改為嶺東縣孝文改為新城縣武德三年於縣東南四十里置北溫州及溫泉縣因縣南溫泉為名貞觀元年省北溫州及新城縣以溫泉縣屬隰州

遠望山一名可寒堆在縣西七十里高五里周迴七十五里

西陽泉源出縣東北去縣十里

永和縣

中下 東至州八十里

本漢狐譚

之涉反

縣屬河東郡後漢省魏初

復置狐譚縣屬河東郡魏廢高齊後主於其城置永和鎮周宣帝廢鎮置臨河郡及臨河縣屬汾州隋開皇五年改屬隰州十八年改臨河為永和縣以縣西永和關為名也

樓山在縣西南二十二里

黃河東去縣六十里

狐躡故縣城在縣西南三十五里

石樓縣

中下 東至州九十里

本漢土軍縣也屬西河郡晉省後魏孝文

帝於此城置吐京郡卽漢土軍縣蓋胡俗音訛以軍為京也隋開皇五年又以吐京屬隰州十八年改吐京為石樓縣因縣東石樓山為名也

石樓山在縣東南六十里水經注曰蒲水出石樓山

黃河東去縣九十九里

龍泉水出縣東南去縣十里山下牧馬多產名駒故得龍泉之號

縣理城漢土軍城也其城圓而不方故謂之團城

元和郡縣圖志卷第十二終